



Aqqalu C. Jerimiassen

UKA 2025/11-1

Atassut

30. September 2025

2024-mut Nunatta Karsiata naatsorsuutaasa akuersissutigineqarnissaannik siunnersuut.

Aningaasaqarnermut Akileraartarnermullu Naalakkersuisoq

Amingartoorutit aatsaat pisinnaasarput aningaasaqarnikkut eqqanaarinertaqanngitsumik akisussaassusilimmillu pisoqarsimanngippat ukiumi imaluunniit ukiuni akileraarfiusuni.

Ajoraluartumillu uani takussutissaavoq, ukiut ilaanni aningaasarsiornikkut naatsorsuutiginnngisamik amingartooruteqariaasaartoqarsinnaaffinnut eqqanaarsarsimannginneraasiit eqquinerluttoq, maannalu ukiuni tulluuttuni tamanna nammanneqartariaqalersussanngortoq tamatsinnit.

Ukioq 2024 tassaasimasoq taaneqarpoq suliffeqarfiit pisortanit pigineqartut naatsorsuutiginnngisamik amingartoorfigisimasaat, taannalu isertitassaraluatut missigiussimasanit annertuumik uniuitsitsisimasoq.

Ukiorpanngortunilu Atassummiit tikkuartuartsimasarput, tassalu peqqinnissaqarfippat annertuumik ajornartorsiorfiusoq, kingumut naatsorsuutiginnngisamik aningaasartuuteqarneruffioqqimmat ersiutit annertuut maanna atuupput.

Qujanarporli maanna tamanna inuiattut tulluusimaartuujuarniarneq tunulliutiimilaarlugu inuup peqqissusaa pingaernerutillugu naalakkersuisorilikatta naalagaaffimmik suleqateqarnerunermikkut annertoqisumik sipaaruteqarfigisinnaalermassut, naak sulianut kiffartuussinikkullu ajorseriaateqarfiusussaannngitsumik, immaqali illuanit pitsanngorsaataanerusussamik. Immaqamiaasiit ilaannit pituttorneruniarnertut taaneqassooq, inuulli peqqiilliortup pituttorneruneq imaluunniit suleqateqarneruneq immikkoortikkunnanngilai inuunerminik annaassisinnaasussamik kinguneqassappata.

Kunneqarfimmiitilluta suleqatigiiffiginnaasagut aningaasatigullu pissarsiaqarfigisinnaasagut qaa tamaarsuunniartigit, naalagaaffiup aningaasaleeqqinnerusinnaanini sorpassuartigit erseqqarissartareerpaa, uagut atorluarniaannagassaraarput pitusimaniarnermut saqitinniakujuppallaanngikkaluarlugu.

Uanili ukiuni pingasuni kingullerni nunatta karsiata naatsorsuutaani aningaasat uninngassutit (egenkapital) eqqarsaatigalugit eqqanaaqaarnagit iliortuarnerup takussutissippaa, naatsorsuutigut kisitsisinik inngianartumik aappaluttunik inissisimasut.

Tamannalu Atassummiit ajuusaarnartuutipparput, neriutigaarpullu tassa maannamiit akisussaassuseqartumik naalakkersuisugut, ingasammillu Aningaasaqarnermut Akileraartarnermullu Naalakkersuisorput Kukkunersiunermtu ataatsimiitsitaliaq malinnaatilluartaarlugu ingerlasarumaartoq, taamatuttaarlu Aningaasaqarnermut Akileraartarnermullu ataatsimiitsitaliaq aningaasanik



aaliangersaassatilluni tigoriaannaateqarnerup sapinngisamik aalaakkaasuutinnissaa eqqanaarniartarumaaraa.

Oqarnianngilagut Nukissiorfinni akit assigiiteqqilerneqarsaneri ajortuusoq, kisiannili tamanna Nukissiorfiit missigersuutaat qiviassagaanni unammillernangaatsiartumik inissisimasoq takuneqarsinnaavoq, tassami assigiissarneqareernerisa kingorna pisortat suliffeqarfiini aningaasatigut qanoq sipaaruteqartigineq naatsorsorlugu kommuninut pisorta qarfinnullu aningaasaliissutaasartut aqqutigalugit aningaasalersorneqartaraluarat, taannalu maanna qanoq ingerlanneqarnersoq paaserusunarluni. Taamaattumillu Naalakkersuisut tamanna erseqqissumik naqitanngorluguluunniit apuussinnaappassuk qujanassagaluarpog.

Nunarsuatsinnimi suut tamarmik akitsoriartorfiini, orsussarlu avataaniit eqqussugarput sumiiffinni erngup nukiganik nukissiuuteqarfiunngitsuni atorfissaqartittuarparput, akili kWh-imut tunnittagaq tamatsinnut Qaanaamiikkaluarutta imaluunniit Nanortalimmiikkaluarutta assigiippoq, naak toqqammaviusumik akivia tassani assigiissanngikkunaraluaqisut, oqanngilagulli assigiinngeqqilissasut.

Aalisarnek suli nunatta nappataata annersariuarpaa, sulilu taamaattuarallassasoq naatsorsuutigisinnaavarput, allamimmi nutaarluinnarmik aningaasarsiorfimmi annertoorujussuarmik nassaanngikkutta taamaattuarallassooq. Taannaavorlu nunatta aningaasaqarnerata iluusaanik sanngiiffiginerpaasatsinnut ersiutaalluartoq, tassalu ataasiinnaq aningaasarsiorfik isumalluutigivallaarparput Naalagaaffimmit ataatsimoortumik tapiissutit avataasigut. Siunissamut tamanna aningaasarsiornikkut eqqanaarinninnerunngilaq, aningaasarsiorfissat nutaat erngup nukiganit allanillu avammut nioqqutissiarineqarsinnaasunit nutaanit eqqarsaaserlorluarnitsigut pissarsiffissaraarput.

Maannatullu inissisimarusaaginnarusunngikkutta, maannagaaq iliuuseqarnissamut piffissaavoq maannakkut.

KNi A/S, Royal Greenland A/S allallumi maannamut qanoq sinneqartooruteqartarsimanerannittaaq isumalluuteqartarnigut annertoqaat. Annerusumilli maannamut isumalluarnerungaalinngilagut Atassummiit taakkununga tunngatillugu, tassami sumiiffiit ilaanni avannaani aalisarnikkut qaleralinniarnermi piissasineq atuutillattaarpoq, tonsillu tunniunneqarsimasut kvotetut eqqarsaatigalugit, akileraarutitigut isertitassatut naatsorsuutigisatta suli minnerorataqqissinnaanerata ukioq mannamut naatsorsuutit aappaagumut pineqalerpata aarleqqutaqqiinnarsinnaalluni.

Takussutisseeqqiinnarporlu, nunarsuatsinni pissutsit taamannak najummatsisimanarujussuartillugit aningaasaqarnikkut eqqanaarinnisummik sillimmammik peqartariaqalivissortugut, nunarsuatsinni sorsoqqajaanarujussuit sorsunnerup nillertup kingornali aatsaat taamak sukasimaartigilerunarmata, oqaluttuarisaanerlu qiviaqqilaaraanni, ingasaassilluni talerperliuniat nunani killiunerusuni qaffakkiartuinnarsillugit nunarsuaq toqqissisimanarneruleriartunngilaq. Tamakku europami alliartuinnarsillugit EU-p piunera ulorianartorsiorfusinnaavoq, USA-mi MAGA milliartorallarniarpasinngilaq, najummatserfissagut arlaqarput, suleqatigiittariaqarpugullu suleqatigut uppisinniarsareqinatigut.

Nunatta karsiata 2024-imut naatsorsuutai Atassummiit tusaatissatut tigullutigit ukiup siulianit qinersiviullu uuma siulianit pisuummata ilusaatut isikkoqartillugit aappaasaaneernejarnissaanut innersuuppagut, amerlanerussuteqartulli ataatsimiitsitaliakkoortissappatikkit aporfissaliigata tamanna ataqqissallutigu.